

10 DEC 1996

PEGAWAI BANK INGINKAN KEHADIRAN PM DI SIDANG PUNCAK MIKRO DUNIA

KUALA LUMPUR, 10 Dis (Bernama) -- Pengarah urusan Grameen Bank, Bangladesh, Professor Mohammed Yunus amat menginginkan kehadiran Perdana Menteri Datuk Seri Dr Mahathir Mohamad di Sidang Puncak Kredit Mikro yang diadakan oleh Bank Dunia di Washington DC pada bulan Februari 1997 akan datang.

Bercakap kepada pemberita pada bengkel "Bank Poor 96" anjuran Pusat Pembangunan Asia Pasifik (APDC) di sini hari ini, beliau berkata kepimpinan dan sokongan Dr. Mahathir terutama bagi negara-negara membangun disanjung di seluruh dunia dan kehadiran beliau pada sidang tersebut amat diinginkan.

"Masalah dalam membasmi kemiskinan di rantau ini ialah tidak ramai yang mahu membantu ... dan akhirnya kami terpaksa menyelesaikan masalah kami sendiri," tambah beliau.

"Kami perlukan seorang pemimpin dan beliau (Dr. Mahathir) merupakan seorang pemimpin yang akan berjuang dan mendesak rantau ini melakukan apa yang perlu dilakukannya bagi memulakan usaha untuk membasmi kemiskinan," kata Muhammed. -- BERNAMA

MK KY/sia